

摘藻堂四庫全書薈要

集部

欽定四庫全書薈要

集部

大復集卷七

五至



詳校官候補通政司經歷臣郭祚熾

欽定四庫全書薈要卷一萬六千九百六十二

集部

大復集卷五

明 何景明 撰

樂府雜調四十二首

興隆祀丁曲

稱朱竿揚朱絃鳴鐘朗鼓各在懸月建酉日次丁牲全

醴成告于庭

一解

久哉斯道淪以失天啟神聖我祖出用

夏變夷四海一遐土之人炳文質

二解

昔者子欲居九夷

百世之下乃享于茲猗與斯道垂憲靡遺

解三

浩浩皇皇

八荒九州罔或靡知罔或靡由曷知曷由我祖之休

解四

### 羅女曲

羅女年十五自矜好顏色山葉雜山花挿髻當首飾  
蠻方立門戶男女多生涯昨聞城中市女出男在家上市  
買黃絲染緝作花布裙短衫袖長不惜雙脚露夜行山  
中道何處吹蘆笙我歌連臂曲曲罷動郎情動郎情與  
郎匹生女復長男三年始同室

落葉哀蟬曲 并序

落葉哀蟬曲者漢武帝之所作也李夫人早夭帝思之不已為作此曲也

寂寥兮寒閨空帷兮晝低若有人兮感羅衣魂恍惚兮  
往復來涼風飄颻兮吹玉階秋葉颯兮鳴蟬哀有鳥嗟  
嗟永離乖雙棲比翼兮何時諧

剡溪歌

溪之水兮幽幽誰與子兮同舟舟行暮入山陰道月濛

濛兮雪皜皜千載重尋戴逵宅溪堂無人夜歸早乘興  
而來興盡休君不見王子猷

悼遠辭

并序

侍御顧君祖存元先生生哲弗祿死夭弗塋侍御君  
追念後先言嘅淚下景明君同年友也哀其意作悼  
遠辭曰

矯矯龍蛇兮沒於泥沙嗟苦先生兮獨罹此嗟連彼脩  
路兮驥驟不力美璞弗器兮良田不食嗟苦先生兮獨

罹此極

倚柱操

并序

倚柱操者魯漆室女之所作也漆室女倚柱悲吟鄰人問曰欲嫁之女曰吾憂國傷人心悲而嘯豈欲嫁哉遂自經而死予哀其志援琴而托其聲焉

兔則有宜兮鳥則有羅國無人兮將奈何心之憂兮豈曰予未有室家嗟嗟室家非我營兮我生曷榮兮

戰城南

戰城南戰不息朝戰城南暮哭城北積尸累累肉腐鳥  
不食放馬澤中雪沒馬腓沙寒草枯不得馬肥北風夜  
吹胡兵四圍我欲上馬馬瘦不馳我欲射箭弓硬不開  
但語城中親汝出收我骸戰城南君莫悲猛虎噬人翔  
於山垂欲食虎肉不避虎威男兒立功橫行四夷生當  
封公侯死當白骨歸

巫山高

巫山高極青冥間翠綰參差十二鬟神女仙裙佩纓動



行雲飛入荆王夢，含情流盼輕煙中。  
玉床瑤枕薦君宮，紫羅白縠垂香風。  
恍惚魂散莫與同，微霜銷落高丘樹。  
哀猿孤吟鳥雙去，荒淫淪滅竟何為。  
暮雨冥冥歸古祠。

芳樹

芳樹離離朱華而綠滋，華滋雖云好，秋風暮來吹，秋風不足卹，華滋亦有時，嗟汝枝上鳥，汝去將安歸，美人何方至，貽我江上華，秀彩奪人目，胡為在天涯，天涯雖榮好，不如常在家。

關山月

關山月夜照青海頭白骨征人怨紅顏少婦愁少婦含  
頻望月來月明流影洞房開歲暮機中縑素出夜寒燈  
下剪刀催年年搗衣明月秋明月還隨隴水流閨裏空  
教看破鏡沙場不見大刀頭

琳池歌

并序

琳池歌者漢昭帝之所作也

木蘭為檝文梓為船青荷為蓋衣紅蓮宮娃側坐揮繁

絃淒風嫋嫋飄素秋  
飛花委葉承波流  
霜露夜下不可留

招商歌

并序

招商歌者靈帝之所作也

高館閨兮曲池通  
乘舟夜逐荷葉東  
持荷作衣難為縫  
金瑄玉鳧響秋空  
歌婉聲長待夜終

公無渡河

公無渡河河濁不見日  
汝今欲往何時出  
公無渡河河

廣浩無涯往而不返化為泥與沙夸父渴走成鄧林至  
今丘塚猶岑峯河中蛟龍見人喜縱有舟楫誰救爾噫  
嗟嗟公無渡河渡河而亡不如陸死噫嗟嗟公無渡河

明妃引

明妃絕色世無鄰粉黛那數三千人咫尺宮門接前殿  
君王只向圖中見當時自恃如花容美醜誰知由畫工  
單于日近漢日遠萬里風沙魂不返琵琶馬上再三彈  
翠袖朝啼關塞寒皓齒明眸葬胡地千秋遺曲猶悲酸

燕支暮雲白浩浩胡兒吹笳雪飛早山前孤塚高嗟我  
歲歲春風長青草古來抱節本難遇况復蛾眉人所妬  
君不見長門宮不用黃金買詞賦縱有朱顏君不顧

短歌行

冉冉秋序肅肅霜露蓄我昔酒召我親故鳥歡同林水  
歡同源矧我同鄉胡能弗敦耀靈西藏明燈在室更長  
夜良可以繼日園有藝菊庭有樹蘭秋芳是悅春榮曷  
觀高陵可升海水可測出門異路安知南北生年幾何

去者日多子不我樂聽我短歌

銅雀妓

墓田望不極松柏夕離離  
存生有歡怨亡沒詎同思  
井幹日已摧總帷寧復施  
衰榮互相謝身後徒爾為

苦寒行三首

天地黯閉塞冰霜皓崔嵬  
寂寥高城側鬱律見古臺  
烈風夜中起飛雪千里來  
烏羽沈不施獸口噤不開  
虎豹斂穴窟蛟龍俱凍埋  
六龍銜白日寒苦光不迴

二

石裂南山水結中河流莽莽北郭外死骨聚如丘貧  
士被毛褐寡婦無完綈寧知貴公子絲竹宴朱樓方辭  
白羽扇更御青羔裘

三

天風日夕厲海水不揚波飛雪被千里層冰白峩峩嗟  
汝窮閭人無衣當奈何錦裘長安兒白馬鳴玉珂象弧  
插彫韞射獸西山阿

塘上行

蒲生寒塘流日與浮萍儔風波搖其根飄轉似客遊  
客遊在萬里日夕望故州鷓鴣鳴歲暮蟪蛄知凜秋暑退  
厭締綌寒至思重裘佳人不與處圓魄忽四周房櫳淒  
鳴玉紈素誰為收白雲如車盖冉冉東北浮安得雲中  
鴈尺帛寄離愁

放歌行

天命諒靡易富貴安足陳自昔慕豪勝重義還輕身整



轡逾鞏洛驅車入咸秦立觀青雲上馳步要路津射策  
報明主投書干大臣身為五侯客家與七貴隣杯酒縱  
經過冠蓋羅逡巡顧盼生光彩吹噓借陽春各矜意氣  
好自比骨肉親時事多變異交道亦湮淪要盟等金石  
棄擲同灰塵赤心不足恃白頭更如新歸來嗜藜藿偃  
仰隨松筠始知葵藿甘不若蘭桂辛願從白屋士請謝  
玉堂賓

鴈門太守行

壘壘高山莽莽代谷城邊風起沙漠漠城內惟聞秦胡  
樂太守下車買牛息戈陶民禮義朝絃暮歌北歷黃沙  
磧南遊白草原五馬何秩秩朱英導文軒嗟哉太守亦  
孔武時時較獵西山下

梁甫吟

君不見泰山高高梁甫在其半古來封壇禪地無宮館  
崖崩壁圻鐵鎖斷秦碑漢碣何人看自從生人開九州  
九十六帝行權謀虎豹咬食龍蛇憂朝翻暮覆作雲雨

立談坐笑生戈矛鬼神來往仙不死塵埃萬變扶桑流  
君不見田疆論功爭二桃齊門三丘埋野蒿又不見魯  
連辭賞輕千金却秦救趙何雄豪眼前無人辨曲直身  
後聲名更何益拂袖空憐蹈海心護車枉負排山力梁  
生五噫歌莫哀東絕梁甫觀蓬萊千年雲開錦繡壁五  
色日抱金銀臺瀛洲方丈列仙占文成五利何能驗徐  
生入島竟不回博士儒生盡坑塹我吟梁甫君振衣世  
路崎嶇多是非琅玕芝草海岱曲釣竿拄杖從今歸

採蓮曲三首

青荷晝舒白露晞  
朱光照耀含素蕤  
綠房翠蓋偃參差  
紅妝皓腕映漣漪  
齊聲一氣歌豔辭  
桂舟蘭楫紛屢移  
佳人羅帶宜風吹

二

岸上有柳隰中有荷  
舟中女兒勝吳娥  
為君先唱綠水歌  
起攬長帶垂纖羅  
鴛鴦雙棲翡翠過  
下渚日暮多風波  
葉密花稀愁奈何

三

急歌太短緩歌長清風夕回素雲翔雙鳧飛起向橫塘  
荷花不言空斷腸明月宛轉流西方月中白露沾衣裳  
紅顏青鬢安能常萬歲為樂莫相忘

獨漉篇

獨漉獨漉驅車折軸不畏折軸但畏車覆芘芘者猶生  
彼中衢雖有蘭蕙當門則鉏同行竊金相顧道左我實  
不知彼則畏我食荼知苦食梅知酸狐裘之敝可以禦

寒有虎斑斑伏于林下我欲射虎愧無勁弩肅彼北風  
渡彼中流豈不懷憂與子同舟

白紵歌七首

齊紈越羅霜雪輝吳刀并剪為君裁鳴璫垂珮行相催  
且步雲館升月臺珠纓列座瓊筵開秦箏慷慨趙瑟哀  
含凄斂嘆一作君莫猜

二

鳳樓十二連繡衢雕楹刻楠耀城隅朱檠絳蠟豔紅蕖

金盤玉羞奉君需美人隔坐曳華裾主稱萬年為歡娛  
上客翠蓋停踟蹰

三

千金買笑萬金買歌明珠白璧豈足多長眉窈窕揚秀  
蛾輕身起舞垂纖羅悲絃急管鳴相和三星低戶月沈  
波銀箭金壺奈夜何

四

吳娥白紵為舞衣鏤花綴葉紛葳蕤青春爛熳白日輝

輕帶一舉長袖施皎如流霰隨風飛游龍宛轉翔鵲迴  
傾城絕代人共希

五

手中色絲舊所治青紅碧綠當自知衆中不語心向誰  
感君厚恩私念之東流之水不西馳泰山在前不可移  
紅顏白首奚足辭

六

北里搗鐘東鄰搥鼓吳歛越吟邯鄲舞思義如山金如



土遺簪墮珥不復數窮冬夜長樂未闌流風迴雪滿楹  
前不惜皎潔為君妍

七

白玉瑣闥黃金堂蘭煙蕙火薰象床雕屏羅列組帷張  
繁膏列炬舒華光橫簫挾瑟步曲房朱唇素齒發浩倡  
願為比翼雲間翔

苦熱行二首

火雲崢嶸連赤阪白日苦長不得晚庭前井乾生赭煙

炎埃晝起高塞天侯家陰洞帶流水紗帷白晝淒風起  
美人冰盤薦朱李道上行人多渴死

二

晝眠苦多蠅夜眠苦多蚊炎霞熱霧蒸網縕四體拘促  
何由伸仙人桂宮接蘭苑下望青松踏幽巘我欲從之  
諒非遠塵世何堪遂仰偃

鳴雁行

鳴雁鳴斯其音嘹嘹江路遠遙念汝離漂鳴雁于飛肅

肅其羽遵彼脩渚實維汝所洞庭增波沙朔多風何寧  
往來無郵爾躬飛斯鳴斯求蒲與稗無伴霰雪及爾遊  
邁高山有石高木有枝我思我朋嗟哉可遺

行路難四首

牀有織綺篋有織素請君視綺還視素憐新不如莫棄  
故樽中有酒盤有飧聽我為歌行路難衆中歡樂多志  
氣豈知他人不得意白日有時不照地安得保君常不  
棄

二

天河熒熒西北轉織女牽牛不相見由來天上亦別離  
何怪人間有悲怨世情磷薄惡衰賤駕車騎馬有人羨  
少年不得君愛惜紅顏勝人亦何益

三

高樹鳥不集常有東西南北風君子衆所畏好惡不合  
常相攻拔劍欲有適前有虎兕後虺蜮抵節徒歌行路  
吟高飛未有橫天翼

四

我發行路歌諸君請勿譁嚴冬霜雪雖可畏三春草木  
自榮華人生富貴各有時不勞辛苦更咨嗟百年冉冉  
寧復多白日速如東流波眼中世事只如此生前不樂  
將奈何

棗下何纂纂

種棗北牆下棗熟委路衢行人競取食居者守空株憶  
昔棗初赤傾路且停車棗當今日盡誰能少踟蹰天命

誠不易榮落互相渝功勲本積累傾奪在須臾  
聆我東  
下言貧賤可久娛

大復集卷五

欽定四庫全書薈要卷一萬六千九百六十三

集部

大復集卷六

明 何景明 撰

樂府雜調四十一首

俠客行

朝入主人門暮入主人門  
思殺主仇謝主恩主人張  
燈夜開宴千金為壽百金  
餞秋堂露下月出高起視  
廢中有駿馬匣中有寶刀  
拔刀躍馬門前路投主黃  
金去不

顧

河水曲

河水何濺濺暮采河邊蘭君隨河水去我獨立河干

車遥遥二首

馬立車遥遥望望車塵滅但聞上車語不得下車別

二

寒鷄喔喔知夜半隣翁春梁婦炊飯僕夫間鷄趣車起  
欲明未明行十里火輪飛出扶桑霞羲和騎龍鞭日車



君看日亦無閒時我車安得長在家

隴頭流水歌三疊送劉遠夫行

我欲望長安隴坂高蔽天隴坂高可陟隴水鳴濺濺

二

盤盤上隴車斑斑下坂馬我非虎與兕使我行曠野

三

長安有高樓不見隴西州可憐隴頭水日夜東北流

下陵曲

上陵風以雨下陵月星露

一作上陵有風  
雨下陵有星露

不見西陵宮

但見松栢樹朝行西山曲暮至長安道長安車馬多風  
吹陵上草

直路行

直路難行直言難受邪徑捷足莠言悅口直言如矢聞  
者畏憚如射曲巷鮮不折幹直路坦坦不可避難大夫  
史魚死以尸諫汲黯抗言不冠不見輪扁之言桓公是  
悟焦不避烹秦皇霽怒猛虎在前不為我言虺蛇在後

不為我告二世自悶遭害于宮號君怒御枕塊道中不  
忍其憚寧忍其亂苟畏爾恥必視爾死如藥弗潰其疾  
必遂如矢不直不能貫革小人惡直君子是持神之聽  
之終獲其釐

海山謠

斷鼇立浪海水裂蜃魚食日日五色海中靈氣變莫測  
白晝須臾風雨黑彭祖夭巫咸滅龍伯死精衛絕山亦  
可搖水可塞

秋江詞

煙渺渺碧波遠白露晞翠莎晚泛綠漪蒹葭淺浦風吹

帽寒髮短美人立

泣一作

江中流暮雨帆檣江上舟夕陽

簾櫳江上樓舟中採蓮紅藕香樓前踏翠芳草愁芳草  
愁西風起芙蓉花落秋水魚初肥酒正美江白如練月  
如洗醉下煙波千萬里

瑤琴怨

美人竹間亭虛簾空月華相思湘江曲淚竹生斑花花

開為誰好花落不復掃出戶見春風低頭怨芳草坐彈  
五十絃起視江月殘愁絃不堪聽手溢金鴈寒一彈正  
淒切再彈轉嗚咽三彈撥幽腸聲亂冰絲結西風吹芙  
蓉一夜落舊紅豈知瑤瑟音能消青鏡容

黃頭郎

黃頭郎爾母侮殿上天子憐府中丞相怒爾雖有銅山  
運去銅如土黃頭郎爾母侮

黃鵲歌

請君勿諠譁奉君黃鵠歌黃鵠一飛去翱翔天之涯我  
欲致此烏雲中無網羅安得生羽翼從彼凌丹霞山川  
遼以邈不歸當奈何

烏夜啼

啞啞烏啼宮井霜殘月半落明星光城頭吹笳已復罷  
宮中擊鼓殊未央

竹枝詞

十二峯頭秋草荒冷煙寒月過瞿塘青楓江上孤舟客

不聽猿聲亦斷腸

采葛篇

野風吹葛葛逾好  
綰霧縈煙青嫋嫋  
谿迴水白雲石蒼  
石根引蔓百尺長  
越婦腰鎌赤雙足  
褰裳行歌入中谷  
朝日未出霧露寒  
花繁葉密採掇難  
年年積絲作締綌  
奉以服君君莫斁  
君知衣葛好不知  
採葛苦白日畏逢  
蛇月黑畏逢虎君  
不見吳王宮中細  
腰女日向歌筵著

白苧

霹靂引

石湫黝黝黑雲夕蛟龍夜起隨霹靂盤空殷地出絕壁  
驟雨飄風怒相擊空中將將下矢石千戈萬馬俱辟易  
飛鳥墮地委如積古檜長松盡遭劈吁嗟乎阿香深山  
巨海胡弗往短域脩虺兼題

刺促篇

刺促刺促井燎不續雖有場苗室則靡粟羅雀務獲不  
言其多見彼淵鱗或言其苛跣夫逐鹿坐者食肉苟一



需百百爾莫足譬彼乘車弗率坦野驅馳不已或敗爾  
馬河有伏苦蛟龍去之相彼有明孰逢其災前有鼓樂  
後有寇盜方言方笑不敢以告執鼠不力或傷其手彼  
虎彼兕矧不以走有蓬其樹其腹之枵豈不休息維顛  
在朝

處州別駕行

處之地山水迴處州別駕賢且才別駕來郵吏馳騎連  
連鼓雷雷城門大開別駕來別駕來御駟馬雙麾在前

高盖娜娜入有列戟出有負弩吁嗟別駕才且武江之  
水去悠悠兩帆揚別駕舟處人來迎申人留嗟別駕安  
以適彼安以去我

種瓠詞

種瓠東園內瓠葉從風翻綠蒂飄長帶素花密以繁雖  
無百尺根枝蔓自纏綿雨露冒時澤陽暉被朝暄竊比  
女蘿草附身托高垣綠吟齊結食豈貴充盤餐願為連  
理杯長以奉君歡

雙燕篇

雙燕何翩翩飛去仍徊翔依依止畫閨繾綣鳴東廂昔  
來屆陽節今去易寒涼祇恐秋風高海路多煙霜雙飛  
入君戶雙栖在君梁被蒙君仁惠彈射不相防養雛毛  
羽成送雛還故鄉雖無黃雀報歲願巢君堂

去婦詞

娟娟竹竿釣魴及鯉魴鯉可食竹竿何以子有錦衣莫  
忘布襦子有旨酒莫忘糟糠賤妾嫁君所期偕老紅顏

難長倏已白首白首雖可出不念紅顏日

種麻篇

種麻冀滿丘種葵冀滿園孤生易憔悴獨立多憂患當  
行思故旅當食思故歡先機失所豫臨事徒嗟歎升蕭  
艾乃至鉏桂致傷蘭物理有相附疇能識其端斷金俟  
同志抱玉難自宣交結良匪易君當圖未然

月食篇

仲夏月食月半缺仲冬月食食之既皇皇下民亦孔之

悸熒熒其魄有物薄之彼盈而微實度之宜今此下民  
孰使告爾災嗟嗟亦悸孔哀有烈其風自伊天阻雲旗  
載揚矇瞽奏鼓率彼下土訴于帝所訴于帝所光復于  
天光復于天其明罔愆照臨爾下民

國士行

漆身為厲吞炭為啞更名入宮廁變形伏橋下雖不禡  
離魄猶得斬離衣生有國士名死為壯士哀

誰謂河廣行

誰謂河廣濁不見泰山孟水之清可別媼與妍清濁苟  
異小大安足言君子知之衆人皆茫然

下宮行

下宮兵來圍朔妻置兒袴中兒不啼一索不得當再索  
孤兒那可活嗟杵臼爾為朔客我為友立孤誠難死何  
有嗟程嬰女當徐死難當事爾強為難我為易千金詐  
賣趙氏子真孤乃存杵臼死復趙社嬰刎頭報死者

易水行

寒風夕吹易水波漸離擊筑荆鄉歌白衣灑淚當祖路  
日落登車去不顧秦王殿上開地圖舞陽色沮那敢呼  
手持匕首摘銅柱事已不成空罵倨噫嗟嗟燕丹寡謀  
當滅身先也自刎何足云惜哉枉殺樊將軍

君子有所思行

一字起十字止

猗君子有所思居高無民不如守卑衣錦負薪入市見  
嗚神龍在洿淖反為魚鯿譏鳳凰不得地翻身避羣雞  
騏驥雖能千里逐鼠堂上不如狸丈夫秉性天所定流

俗是非何足移水中馬與陸地之魚曷謂失所置能久  
須寧為地上特生之野草不能為茂樹負巖牆而居

燕銜泥

君不見燕啣泥為巢哺雛常苦飢雛有羽翼各自去安  
能久在梁上飛丈夫出處亦如此貧賤富貴皆人為燕  
銜泥不慮哺雛勞但慮衆雛飛不高

養蠶詞

桑葉青蠶始生桑葉莫莫蠶白滿箔今年女兒道蠶早



晝夜照蠶恐蠶老浮萍生葉麥落花風簷綠絲鬪鳴車  
君不見簇上蠶乾死老蠶成蛾又生子

嗟哉行

老烏能啄牛能觸嗟哉世人互傾覆自徹其藩盜入屋  
同病者憐同憂者嘆臬子奪鳳衆雞不安何得同類反  
相殘彼梁可逝窵可避禍福由人豈天意君不見虎雖  
有爪鴻有翅

雙鴈篇

錢水部世恩在宦失偶日夕哀吟其友何景明為作  
雙鴈篇寄之

雙鴈雲中來雍雍揚鳴音念子中路散一飛與一沈冥  
冥江湖道思歸苦不早昔為並棲禽今為特飛鳥飄沙  
戀故浦別流思故河奈何同溝水翻作異派波烏悲多  
苦音客悲多苦言絃爾孤桐琴操我雙鴈篇

莫羅燕

羅雀莫羅燕燕飛在高殿殿高且深誰得見主人垂幕

高殿中燕來徘徊不敢通  
楊花落燕出啄童子張羅逐  
黃雀黃雀入羅燕入幕

牧犢行

黃牛遇虎南山下夜見白石心中怕  
牧童牧犢畏虎欺  
挽弓邏之不敢離  
削竹為簇蒿為箭射虎恨不穿虎皮  
嗟汝虎爾勿欺我犢我犢有日頭生角

城畧陽

扶風令城畧陽賊來畧陽令走藏  
扶風令為登城喚抽

乃誓衆衆不散三日抗城一日戰戰不利分生縛見見  
賊罵賊危不變畧陽城人盡為鬼畧陽令生扶風死守  
臣上奏驚天子君不見扶風令死封公御嗟爾畧陽之  
令胡為生

潘節婦

二十君辭房六十妾在堂紅顏為婦白首孀昔日抱女  
今已亡風火炎煙黑隣里相救失顏色未亡之人安所  
從義不避火天返風噫嗟嗟妾雖有身君無子身未化

石心不死

高城行

高城巖巖山百堵白日樹旗夜懸鼓將軍戒嚴太守武  
城下賊來城上穀弩樓軍轉石城人負土噫嗟嗟城完  
家可全城破家為虜傳與城中人但保城莫閉戶

南山篇

并序

宏器為思親卷予為作詩文及今八年矣宏器得貢  
將入京復以此冊求予詩遂為是篇

朝采南山白石盤盤風來吹葛葛葉幡幡豈無枝蔓念  
我本根翹翹粟薪靡考誰蕪緝緝葛絲考則靡服篔簹  
澗魚在留麗麗昔用為飧今用為祭上陵折松下坂折  
柳遙遙遊子勿以行久月不恒處日則有酉瞻彼日月  
思我父母

轅下駒

轅下駒鳴聲一何悲豈無萬里志跼躅安能施詰曲羊  
腸坂纍纍太行谷車輪不行白日沒仰思玉山意超忽

君不見八駿日行萬里馳  
煙掠景誰能拘吁嗟乎轅下  
駒

大復集卷六



欽定四庫全書薈要卷一萬六千九百六十四

集部

大復集卷七

明 何景明 撰

五言古詩五十首

武陵 以下使集

武陵一何長遼遠不可測高林多悲風慘澹日無色黃  
熊啼我前白狐跳我側蛟螭蟠深淵下見奔雲黑沙蒸  
水亦毒我僕飢且踣辭家忽踰秋適此萬里國土風日

以殊川域邈無極伏波有遺響吟餘轉悽惻何因托橫  
吹一寫千載憶

桃川宮四首

神宮蠱飛觀結構俯層丘上翳萬年樹下暎千尺流仙  
蹤久已沒百代傳其由荒塗橫白雲寥寥安可求

二

谿谷多青氛朝暮不可知雞鳴洞中樹輕暎散華池白  
石流丹液靈葩耀朱蕤誰能學丹術遂使塵網離

三

石洞無遺構空巖長松桂入深忽已陰升高稍知霽山  
先晚多姿谷響秋轉厲緬懷避秦者一往成永逝

四

溪中何所有磊磊多白石紫參生其陽青松植其北遠  
林高氣清絕獻夕光白何當發雲奏招我吹簫客

自武陵至沅陵道中雜詩十首

承明播宸渙西適蠻夷州艱哉武陵山古道何悠悠狹

谷不容慳水中無行舟仰探虎豹窟俯瞰蛟龍湫徘徊  
遲吾馬中心懷懍憂脩程尚延亘我行何時休

二

羣山何逶迤環峙如百城其上干青霄其下浮雲征出  
沒千萬態倏忽殊陰晴撫茲豁心目頗慰羈旅情

三

亭午入大谷烈陽經中天樹木多鬱蒸石圻起焦煙掘  
地飲我馬數尺不得泉僕夫告飢渴揮汗墮馬前安得

萬間厦坐使清風延

四

暮投界亭驛候吏迎我前  
息徒茂林側飲馬山下泉  
落日四巖陰餘映高樹巔  
坐久吏人散濁酤聊自延

五

驅馬山上行山高何巍巍  
脩阪接飛翼百步仍九迴  
俛視煙靄中衆山鬱何壘  
茫然望四海萬物亦已衰  
昔我別京國朱華猶未希  
歲節忽復易何時當旋歸

六

大壑百餘尺流水浩湯湯我行路中斷欲渡無橋梁誰  
為理舟楫石亂不可航改轍上危棧登茲千仞岡臨深  
古有戒側足以徬徨

七

叢薄被煙臯徑路紆且微秋風振喬柯綠葉漸以稀日  
入羣動息林深衆響歸君看棲枝鳥大小必相依

八

山深多樹木百里人民稀時有四五家茅茨隔山陂沙  
田不可耕何以禦歲饑門前數畝園祇收蓬與藜平明  
出汲澗薄暮始得炊童稚那敢出但畏逢虎羆草黃納  
晚禾桑綠催官絲嗟爾遠方人辛苦誰具知

九

山勢行轉促連峯相貫輸窈然林莽中乃復得坦途青  
壁結煙靄縹緲凌虛無層阿秀嘉禾下覆清水渠風志  
好幽僻覽茲耳目娛公車雖少延顧盼忽已踰安得鼓

清瑟日坐山之隅

十

谷轉岡漸平策駕循陂陀遙望辰陽城枕山帶長河飛  
甍若鱗次居人亦何多按節駐江館登眺崇山阿南衢  
聞夜絃北里揚朝歌誰云接夷域文物殊中華

懷化驛芭蕉

芄芄芭蕉葉植此園中央繁綠布重幄層陰蓋高堂孟  
夏日初赫蕭森蔽炎光衆賓御華館四座借虛涼四序



互更謝南陸回朱陽窮秋多風雨寒冬多雪霜危叢旦  
夕茂綠葉日夜黃本無松柏固安用誇其長徘徊視草  
莽零落同一傷

花崖梧桐

桐生何猗猗其葉何油油白雲蔭崇阿朝日照高丘感  
此雨露滋愧彼蔓草倚鳳凰久不至琴瑟誰可求吾將  
緼繁絃庶以宣我憂

清平令

清平縣之令不識何為者庭前長野桑庭後長山檜猛  
虎上我城青狨啼我舍昨日出城去騎馬到部下部民  
道遮之持刀殺其馬入門顧妻子所居無完瓦秋風吹  
樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失薄  
午游氣清參差衆峯出雞鳴谿谷中始見崖上日雲葉  
分杳冥高原被華實秋風起叢林興感乃非一悠悠遠

行遊歷險難具述

新添

朝登七盤坡復下九折坂長風飄落日杳杳前山晚征  
夫行取薪夜入碇中飯仰視飛鳥還載觀浮雲卷還顧  
望鄉邑日與親愛遠公家尚有程安能速言返

平埧城南村三首

朝出城南村策馬入荆杞村中八九家烟火自成里兒  
童候晨光稍稍荆扉啓四鄰務收穫時復披草語昵昵

何所云但言好禾黍

二

秋陰結林霏細雨洒茅室牧放止近郊牛羊不相失廣  
園散花林平疇藹風日長幼不出門咸知戀倚匹喧喧  
車馬中徒為慕高秩懸輿當何時可使志願畢

三

沉沉古陂水日暮寒更綠隔陂見居人蘿蔓纏草屋摘  
禾留客飯採薪發秋木童稚持竹竿雨中放雞鷺區區

化外國猶得覩淳樸

普定

鼓絕掩山城空堂思超忽孤燈明夕惟悄悄涼風發落  
葉何飄蕭飛螢互明沒客牕臨古寺坐待微鐘歇

城南婦行

城南有寡婦見客泣數行自言良家女少小藏閨房青  
春嬌素手白日照紅粧父母偏見憐嫁我不出鄉前年  
彌魯亂腥穢入我堂弟兄各戰死親戚俱陣亡嗟哉華

豔質忍恥罹凶彊憂愁雲髮變辛苦朱顏傷昨聞故夫  
在息消通兩方百金贖我身三年歸舊疆歸來門巷異  
人少蓬蒿長轉盼夫亦死兒女空在傍薄田無耕犢寒  
臘無完裳人生固有命妾獨遭此殃况復官軍至燒焚  
廬井荒主將貪賄賂百死不一償朝廷自有法出師亦  
有名妾身何足道無乃乖天常

平夷二首

滇南八月中綠林何萋萋居人亦相繫數里聞鳴雞路

轉無詰曲山行少攀躋  
回瞻貴陽道咫尺蹊壑迷

二

夜宿平夷館風悲氣始淒  
月光皎東壁白露寒  
蟬啼憑高視中原但覺衆星低  
長路心益壯浩歌天之西

涪萬

孟冬氣始肅葉落北風涼  
寒水斂溝壑餘輝照橋梁  
方舟下涪萬所歷非一疆  
崇朝越千里川塗渺蒼蒼  
浮雲帶城邑壯麗逶且長  
况多古人迹覽之心慨慷  
登遊豈

不美滯淫非我鄉

泊雲陽江頭玩月

扁舟泊沙岸皓月出翠嶺開牕鑒清輝照我孤燭冷高  
林散疎光遠渚接餘景縱橫銀漢迴三五玉繩耿弦望  
幾更易客行尚殊境佳期邈山岳端坐令人省

涿鹿道中

以下家集

高城鬱莽蒼永路多荆棘日氣夕以陰遊氛浩無極城  
邊古時丘宿草蔓于域樹木何蕭蕭狐狸鳴其側訪古



思軒轅嶽峯何由陟伊昔奮龍戰明明庶邦式神馭飄  
鼎湖烏號緜玄德遺踪邁荒野盛烈存茲國誰云戡亂  
功不俟干戈力風雲變俄頃明晦古難測薄暮窮林中  
慙焉長太息

渡白溝

春行傷旅思單車悵蹉跎晨眺黃金臺夕渡白溝河求  
賢不可見血戰竟如何落日古原下悲風入浩歌

叢臺

邯鄲多俠士趙地產名娼日夕高臺上歡宴殊未央  
黃金飾舞榭白壁綴歌梁安見千年後空令春草長

五平五仄體

秋原何蕭蕭耳目去雜草枯荷猶穿塘苦瓠尚抱隴寒  
風吹空林落日照古冢徘徊觀陳蹤露下髮忽竦

迎霜降

烈風揚雲旗鼓角悲廣路庭前玉樹枝昨夜微霜度幽  
人躡葛屨出戶履寒素胡當戒堅冰及此歲將暮

冬雨率然有二十韻

北風吹零雨冬熱雪不作二儀黯澹交百川莽迴薄沙

霾翳白晝遠望何由豁六龍墮青冥萬象淪玄朔羲和

扶日行紆轡竟焉託神媧補天裂鍊石恐遺落雨伯誰

為誅雲師爾何惡前者十月交震雷轟城郭岸條俱含

柔園卉亂吐萼農家忍朝飢歲暮食籬雀豈無數畝禾

狼籍委秋雹徵求皮肉盡枯骨待剝妻孥在眼前四

季不得樂胡因見陽春所慮轉溝壑閒居值泥淖展矚

翻蕭索雖無長者轍自閉寒士閣長陰下脩麓暝色起  
孤岳喧啾後栖鴉悵望暮歸鶴世途紛轉蓬生計倚叢  
藿永懷昔人駕冥心付寥廓

發京邑四首

弱冠遊皇邑抽翰預時髦出入承明地四海皆同袍浮  
歲奄七徂徇名虛所遭夙痾糾纖質褊性憚形勞駕言  
返初服行矣遂林臯轉蓬戀本根羈鳥思故巢自顧無  
脩翼安能久遊遨

二

驅車出郊門杖策遵古行  
返顧望城闕引領內懷傷  
崇京概霄漢逶迤一何長  
雙觀臨馳道羣宮儼相當  
迅颺激櫺牖游雲起縱橫  
漢道值全盛纓綏爛輝光  
側觀青雲士鳴珮倏來翔  
梁生何慷慨遼遼悲未央

三

親交遠集送斂策西山陰  
前瞻太行道却顧上苑林  
青陽藹廢墟春氣感鳴禽  
所遇豈殊故即事自成今

一作所遇

豈殊時即日平時等榮樂一旦異浮沈昔者同袍友邈若日成古今

辰與參山海去靡極年運日相尋倉卒盃酒間寧不傷

離襟

一作惻惻傷離心

四

行邁越長甸歷歷懷苦辛嶮嶮陟丘隴髣髴望郊闈墟里接雞犬井邑無間人暄陽入廣陌撫撫周原新百城豈不美風土非我隣遙遙盼鄉域言念故所親代越各有性所願還其真胡為去桑梓鬱鬱冒風塵

渡河

夙征肇延津，明晨臨大河。  
洪源下積石，砥柱屹嵯峨。  
渺渺梁宋區，汗漫縱經過。  
自非陵與岸，於安障其波。  
揚帆赴中流，四顧莽無涯。  
崇雲徂廣澤，迅風夕吹沙。  
積陰不可測，魚龍偃相加。  
前無千尺梁，一葦胡足誇。  
人生寡恒居，奚異波上槎。  
豈無舟楫志，漂泊當奈何。

許下

伊昔炎漢季，西京方遘患。  
宮室燒燔盡，乘輿播草間。  
劫

遷留茲域荆棘滿顏垣橫流一以濫大厦寧復完豺虎  
互馳噬鳩鴉厲飛翻日月屢薄食風雲變無端嗟哉衆  
君子杖策起周旋荀公誠偉士弘思濟其艱陳琳自南  
至王粲亦西還從戎藉雄辯騰步有榮觀良蹇豈同御  
鳳鷲不共餐功名安足為明義乃高賢

還至別業四首

雞鳴高樹杪狗吠墟里間家人望車徒遠客造門端入  
門問所親上堂叙悲歡行人暮飢渴一作苦飢秉燭具盤餐



明月照西戶三星爛中天出門踐野草白露倏已溥十年苦行役茲夕方來旋寧知非夢寐忽忽心未安

二

詰晨親友至筐榼携所需各言平生歡念子久離居網繆語未畢展席臨前除園榮亦已抽况有盤中魚人情倦懷土富貴豈常於無為泥形迹所願恒相俱

三

依依入鄉閭惓惓歷故疆行邁踰幾時所見忽以更成

人匪故識者齒日凋喪平生所同歡轉盼殊存亡羈魂  
邈遐域旅樞歸中堂人命不相待奄忽如朝霜撫事感  
今昔喟然熱衷腸

四

弭駕及春暮比屋事耘耕時物展遐矚契我遺俗情故  
林茂以密敞廬亦將成芳蘭冒紫葢園柳尚垂榮澤葵  
蔓廢井瓜田依故城策杖衡門下仰偃遂平生所願在  
怡親餘者奚足營世情惡衰歇天道遞虧盈駟馬豈不

貴翻覆坐相傾

七夕二首

逝節忽不處佳夕復我臨神臆汎光蕙渥露沾華林緬  
彼牛女會茲端竟難謀形影惜相望胡由接徽音飄飄  
翠龍駕髣髴青瑤簪長河坐移轉素波斂西沈靈彩歛  
以晦游雲起層陰同歡戀膠漆異處悲辰參翹思慕遠  
匹感此涕流衿

二

舉俗慕良旦好尚各有趨高樓曝紈綺貧女無繒襦移  
時曜靈沒素月復已舒羣居侈歡宴長坐獨愁吁愁吁  
亦何為同禍與我殊春徂秋未返膏沐誰為娛仰視河  
漢女相違復來俱要知比翼乖各阻天一隅乖離有重  
覲毋使寸心渝

水曲納涼

乘月玩清夜漱流滌煩痾竹栢夾脩水微風揚澤荷苔  
陰皓露溽素鱗躍于波柔條紛斂結勁葉亦隕柯優游

蕩情志俯仰丘中阿雖無朋儕和興言自成歌娛樂當及時千秋豈復多

雜詩二首

西陸移脩晷素節多寒陰端居屏營慮淒氣慘人心浮  
颺委時卉零露傷青林仰見孤雌翔玄鳥無遺音蟋蟀  
何愁苦終夜長哀吟感物興慨嘆憂思孰能任

二

馳輝在西山返景流東隅羣欣被光灼何能待須臾重

陰肅萬物樹木日夜踈叢蕙一作蘭植幽閨含榮耀前除

佳人眇雲端何由致區區常恐霜霰至委棄不我需



大復集卷七



總校官庶吉士臣侍朝

校對官編修臣馬啟泰

謄錄監生臣令狐慕蜀

欽定四庫全書薈要

集部

大復集卷八至  
十



詳校官候補通政司經歷臣郭祚熾



欽定四庫全書薈要卷一萬六千九百六十五

集部

大復集卷八

明 何景明 撰

五言古詩五十六首

六子詩 并序

六子者皆當世名士也予以不類得承契納輔志勵益者多矣茲病歸值秋寤嘆中夜有懷良友因作六

子詩

王檢討九思

王君青雲姿志豈屑丘壑名家出杜鄩少日遊宛洛奮  
身匹文鸞戢羽翼鸞閣興文燭雕龍揮翰凌玄鶴雅志  
在四海隨時偃經略馳情繼謝朓日晏吟紅藥

康修撰海

矯矯龍頭士騰躍在明時羣遊慕豪放棲志固有期赤  
驥鳴烟霄不受黃金羈揮毫御清讌浩思隨風飛燈前  
激高唱顧盼孰與希究古摘遺編頗好班馬辭良史久

無稱斯文當在茲

何編修瑋

中州產名俊河內天下士平生飽藜藿學道歷壯齒至  
樸斂華蔚徽文陋雕綺守淵安可窺馳辯詎能止洞悟  
超先幾微言析玄理曲高難為和行獨寡知己古轍多  
蓊蕪非君誰予起

李戶部夢陽

李子振大雅超駕百世前著書薄子雲作賦追屈原新

章益偉麗一一鸞鳳騫華星錯秋空燭火難為然搗文  
固無匹投義罕比肩抗志冀陳力危言獲罪愆握瑜不  
得售寶棄誰為憐仲舒貶膠西賈生亦南遷古來有遺  
憤非君獨哀嘆

邊太常貢

世士多戚促器識寡蕭散太常何瑰瑋坦然破崖岸祥  
煙拂瑤壇瑞日轉華觀出入諧鸞鸞頽頽在霄漢芳詞  
灑清風藻思興文瀾陽春誠獨步清廟獨一作徒三嘆金

奏響不虧玉樹開逾燦閒居檢遺篇啟篋得爾

一作玩

王職方尚綱

職方吾益友契誼鮮與同少齡負竒氣萬里飄雲鴻手  
中握靈芝高操厲孤桐讀書邁左思識字過揚雄為辭  
多所述結藻揚華風寸心素相許撫志慚微躬

十三夜對月

閒居愛明月良節復與俱金魄麗秋闈皓彩揚雲衢澄  
空斂霜烟清飈蕩中區徘徊廣庭內改席臨方除顧景

休衷慮興心念居諸天道遞消長戒之在須臾懷謙可  
久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離  
離絳霄側冉冉素雲揚踰時灑氣澈懸耀天中央仰視  
渺難即忽覓一作覺在我傍清池含微波左右浥流光月  
行固當望人會何能常與子各鄉域邂逅臨此堂良時  
不屢值明月安可忘醉歌荅永夕和我窈窕章

十五夜高鐵溪同沈清溪趙雪舟馬百愚過敝居

對月

端居撫盛節眷茲金素中上客弭飛蓋惠然慰幽衷  
圓景舒東隅忽復周層空重輪爛五色繽紛結文虹  
流輝接瑤席絳氣鬱以葱衆賓侈佳玩聯篇挹華風  
情好在明月安問膳靡豐弦望有恒度明陰變無窮  
人生非比翼豈得常相同所願御此觴聊以娛夜終

十六夜月

日夕城烟斂列宿出復多開軒望明月展席流素波圓  
輝雖少虧猶能遍天涯單居一作不為樂念遠徒咨嗟

美人越崇京高樓結綺霞浮雲暮長征何由覩光華迅  
飈萬里至霜霧日以加坐憂桂枝歇委落同泥沙清輝

苟相照豈慮天路何一作

十七夜月二首

夕望月已減雲飈蕩其側月減不足憂盈虛本相值胡  
為蔽氛靈坐使清光匿踟躕久延待慘景鬱無色燈前



理鳴絃瑤徽為誰拭思我平生友道遠不可即素書委  
篋筭安得雲中翼滄海多波濤長陰浩難測何當廣餘  
輝一照萬里域

二

更深月復明揚秀青雲端浮颺倏以寂長川靜波瀾徘徊  
廣除下白露棲崇蘭仰見城西樓迴光照文軒樓中  
織綺女延頸獨哀嘆哀嘆未終已素河橫西山逝魄不  
長望玉貌寧久妍君母吝光惠使我芳歲闌

擣衣

涼飈吹閨闈夕露淒錦衾言念無衣客歲暮芳寒侵皓  
腕約長袖雅步飾鳴金寒機裂霜素繁杵叩清砧哀音  
緣雲發斷響隨風沈顧影惜流月仰盼悲橫參路長魂  
屢徂夜久力不任君子萬里身賤妾萬里心燈前擇妙  
匹運思一何深裁以金剪刀縫以素絲鍼願為合歡帶  
得傍君衣襟

悼往

行雲不歸山逝水難重迴與子一為別流光倏如推形  
神往無存夢想弗克諧孤冢日荒穢幽泉翳窮埃重扃  
一以閉千秋寧復開時至展遐沈傾醕澆黃菜還思平  
生居歲久生夕苔寒風吹空閨彷彿鳴玉哀人生重思  
義况茲比翼乖何能眷新歡棄擲故所懷

贈望之五首

遙遙京洛客承命發華輶朝辭冀州野夕泛黃河流雙  
旌翔汝側駟馬登故丘故丘鬱以長岡隴茂松楸車徒

耀城郭親戚迎道周丈夫事四方州閭寧久留王程在  
須臾顧念但懷愁前有盈觴酒為我且綢繆

二

清晨送遠人弭駕北城隈北城一何脩前臨古時臺俯  
仰故鄉域一如平生懷季冬嚴風發積雪皓皚皚念子  
徂遠路鬱結不能開中林寒卉寂樹木何摧頽安得春  
華敷採掇以相貽

三

驅車策良駟北上遵太行升高睇崇京宮觀鬱一作遙相

望前瞻碣石湍俯見東海疆壯觀局宇內高志何激昂

孤鴻暮一作務南翥奮翅起隨陽黃鵠遊四海胡為悲一作

應故鄉何能有羽翼從子俱翱翔

四

昔子當北徂值予復南旋相違踰幾時世事倏推遷訪  
舊半存亡誰能不摧顏浮雲歲暮征餘曜銜西山居人  
念川塗行子戀鄉關平生雙龍劍乖別何時還志士重

金匱要略卷之三  
卷八  
明德窮達奚足嘆願君勗令名相期在盛年

五

人生寓大塊聚散如飈塵昔為同裊好今為異鄉人孤  
獸鳴索偶翔鳥求其羣戀故各有慕何況骨肉親子當  
被華紱結束事明君我當守蓬室聊甘賤與貧去住各  
努力良覲會有因

除夜二首

今夕復何夕偃仰茲歲周懸膏耀室隅中饋進芳饌雖

無車馬客親戚自相酬遊魚安深淵翔鳥止故丘所歡  
在桑梓餘者何復求逝節不重至來者難預謀長跪奉  
此爵延年樂千秋

二

閒居知時節習靜觀卷舒日月無恒處念往寡歡娛歲  
徂浮雲陰積雪皓中衢豫章產江濱孤蕙敷山隅芳烈  
雖靡虧遐遠寧見需所願最明德庶以酬居諸

豔曲八首

御溝連上苑，大道接平沙。  
紫陌三千騎，青樓十萬家。  
城中楊柳樹，風起暮飛花。

二

日出洛城裡，歌鐘起四隣。  
朝遊桃李蹊，暮踏車馬塵。  
遊絲冒白日，冉冉愁陽春。

三

秦氏字羅敷，馮家名子都。  
妝成臨勸酒，曲罷坐當壚。  
白馬金吾子，青絲提玉壺。



四

明姿稱二八生長紫羅帷對客舞垂手邀人看畫眉今  
朝仲春日照影臨芳池

五

粲粲東城子盈盈南陌姝自矜夫壻貴翻笑使君愚日  
暮採桑去空迴五馬車

六

翩翩五陵兒藉綺冠華簪常懷雙寶劍詎惜千黃金馳

馬章臺下紅塵不可尋

七

蘭燈列滿座繁炬灼朱光富貴傾南國佳人出北方畫  
堂翡翠帳夜夜鬱金香

八

高臺一作樓臨萬戶朱構耀城隈共藉鴛鴦綺雙持鸚鵡  
杯春風樓下度一夜百花開

擬古詩十八首

冉冉歲逾邁念君長別離別離在萬里道遠行不歸鷓  
鷯慕儔匹鷺鳥東西飛思展雙羽翼奮起凌天涯向風  
長哀吟欲舉中徘徊川途浩無軌霜一作雨雪愴以悲願  
因駐馳景得覲君光儀

二

婉孌城東姝懷春一何早朝遊採桑陌暮止垂楊道自  
矜全盛時復恃顏色好玉貌隨年化安得不枯槁昔為  
園中英今為路傍草路傍多車馬採掇難自保

三

名都有高樓上入青雲端脩城延曲隅阿閣交重欄佳  
人理清曲當戶橫朱絃揚音絳

一作丹

霞裏令顏誰不觀

賓客會四座絲竹哀且繁日中車馬至薄暮皆言還聽  
曲各言好知音良獨難誰為同心人並起乘雙鸞

四

壘壘北邙山松柏何脩脩松柏有時摧人命安可留朝  
為華屋客暮沒歸山丘洛中多豪貴藹藹皆王侯高臺

臨九衢上有百尺樓宅第儼相望軒車絡如流存亡不  
預保富貴安所求不如邀我友乘馬被輕裘遨遊百年  
內永以忘戚憂

五

藹藹東園內綠林萋以繁車馬自成徑桃李終無言昔  
日東陵侯種瓜青門前既貴亦反賤變化更無端俗夫  
寡恒態志士多苦顏豈不策高路高路遠且艱良無萬  
里風孤翼誰當援

六

朝日照中庭杲杲春載陽東風吹綠草蝴蝶雙飛揚歲  
華坐婉婉白露憐以傷予美不在茲所懷浩難忘豈無  
芳桂枝含香誰為明

七

淒淒仲秋日百卉腓以殘涼風入階樹零露摧庭蘭明  
月皎東壁昆虫鳴草間孤鴻暮安適哀音揚雲端言眷  
平生友振翮起一作蕩孤騫遺我若逝波望子如高山託

枕在終始蓄久諒逾宣寸心不可移磐石誰謂堅

八

鬱鬱山上松高枝布天涯上有女蘿草纏綿誓不移葛  
生蒙於楚浮萍寄清池貴賤雖殊途附託各有宜伊昔  
侍君子朝夕奉恩私馳心在皓首何意中睽離窮年守  
房室常恐踰良時思君如日月所冀光不遺

九

汎汎東流河嫋嫋河上柳春風暮飄搖花飛不相守柔

條欲攀贈何堪入君手惟有南山桐可以遺我友

十

圓如天上月光輝尚當缺與君非一身安能不乖別關  
山日悠遠舉步難可越君如雙車輪妾心如車轍相隨  
萬里去繞繞何時絕

十一

清晨秣駕馬整駕遵路衢遲徊覽故物慙惻心以紆昔  
時千室邑今為百年墟郭郭蔽粉檟狐兔翔城隅人生



寓大塊飄泊寡恒居諒無金石壽終與草木俱一身不  
自恤安用顧其餘營營慕富貴辛苦誠為愚

十二

長安多豪俠白馬一何驕金鞍競絡繹寶劍相招邀招  
邀狹斜道青樓鬱岌樓中妖豔女輕綺揚飄颻皓齒  
激清唱逸響千層霄浮雲散城邑白日隨驚飈熒熒桃  
李顏華早仍先凋結交苟弗宜誰謂能久要

十三

人生百年內胡為形所役登高覽九原但見松與柏徘徊故里閭念我平生戚斗酒相存問度阡復逾陌上堂展殷勤華燈永今夕何必傾庶饜濁酤聊與適朱顏難可常鬚髮會當白徧觀四海人誰為不死客良時弗為歡哀暮歎何益死者長不作生者長不息日月更相送萬古安所極素絲有蒼黃歧路多南北在家常相問出門安可測落木歸本根飛鳥戢羽翼客遊在萬里終當還故域

十四

朝宴高堂上賓友相追遊  
厨人進豐膳妙妓揚清謳  
處世無百齡為樂苦不周  
多財為患害駟馬招愆尤  
安如王子喬高舉凌九州

十五

歲暮寒風至蟋蟀夜鳴悲  
高樓有思婦嘆息不自怡  
良人行未返孤妾守空閨  
衾裯卷不一作寢羅帷  
誰為施君如東流水妾如西  
馳暉形勢不相及彼此何由諧  
結

髮重自念攜手期同歸秋華頌故林尚復揚光輝顧茲  
各努力毋忘榮盛時

十六

迢迢孟冬夜悲風鳴北林嚴霜被野草宛轉時欲沈佳  
人久隔越曠若辰與參方舟不利涉欲往江湖深客從  
南方至遺我綠綺琴願因雲中翼寄子瑤華音膠漆不  
為固金石安足諶明義苟不虧歿齒當一心

十七

青鳥來北方徘徊朝南翔美人傳書至開緘爛生光  
我機中錦宛轉成文章上織比目魚下織雙鴛鴦  
物厚意不薄感激獨一作心徬徨裁為衾與裯置在黃金牀  
君子不為御三歲聞馨香一心奉先惠常恐君遺忘

十八

繁霜降秋夜膏火寒無光  
淒風舉帷幄素月流中房  
容行在殊境一作君子獨處誰與將  
仰視天上星羅列皆一作君子  
成行牛女獨何辜  
焚焚守河梁嗟無臨風翼  
欲去不得

翔引領長太息泗涕徒沾裳

魯連

仲連初歷國排難能解紛飛書下燕將立談却秦軍不  
受萬戶侯長揖千乘君始稱天下士終為海上民

張良

子房號人傑像貌非魁偉報韓志已成翊漢功亦美出  
竒掉三寸決勝在千里一遇黃石公還從赤松子

望郭西諸峰有懷昔隱兼發鄙志

游龍戢淵鱗翔鷲振雲翮潛姿媚幽深遐羽忌拘迫頃  
來稅塵銜秉性嗜探歷連山秀我里幸茲睠昕夕橫天  
巖巒疊映日蒼翠積涉波緬洄泐攀岑若咫尺流目施  
遠坳寫惊異孤石嘉遯懷伊人俯仰慨今昔霞構象丹  
厓烟蘿裊青壁秦本作丹崖象霞  
構青蘿隱烟壁傾耳谷中音希蹤雲  
外迹興性一作感彌深即景無與適豈徒藉虛覲終然  
契冥寂

遊西山二首

晨登山上樓暮望河上道飄風塞埃塵積雨浩行潦  
山  
人苦相留此道何擾擾虎狼夾路啼鴻鵠逝不早石泉  
聊足飲糲飯亦可飽引乃平生親綢繆叙中抱行遊白  
雲林倘遇瑤華草携手託相贈歲寒永為好

二

勝地不可多良遊豈在屢茲山秀靈域曠望契心許  
峴碧巖際縹緲青蓮宇鳴泉瀉丹壁白沙亘迴渚  
眺心  
佇冥寂况有塵外侶吾當與爾曹翩翩接高舉



立春日作二首

藹藹春候至天氣和且清端居撫流化允愜靜者情浮  
陽起叢壑流烟散孤城岸條發潛穎園卉含初榮寫襟  
曠明霽覽物紆游行目悅雙飛雉耳感孤鳴鷺形運自  
相代神理誰為名往規與時逝來慮隨年并心存漢陰  
灌躬敷南陽耕疏還念知止莊論持達生自非秉昭曠  
能不嬰世營

二

鳥鳴知天曙冰泮知天和寒崖變吹律陽渚發鳴葭温  
風戒旦至淑氣應時加申矚暨昏旦馳情赴幽遐連峯  
睇初景木杪眺孤霞陰雪被高岑暄波瀉平沙辨候氣  
有異觸物理無涯撫己寡朋與懷侶獨長嗟徒攀春岸  
條未采中林華情愜賞不遺心曠迹自賒允矣敦夙游  
不愧在澗歌

田園雜詩二首

習宦非我長官久計轉拙遭斥還田廬獲與初念協樹

藝良有期農事固堪悅飄飄綠原風晶晶明川月披襟  
恣吾適既夏不知熱回思行役日寒暑靡得輟踈懶古  
雖鄙任性亦可率膏疇矧豐蔚積潦復淒冽白日皎在  
茲停雲靜如結為謝二三子努力慰衰劣

二

去官今七暑漸與農務親隨宜諳土性言語羣野人時  
或溯微風行歌響空榛先民邈何攀慨焉傷我神慨傷  
適誰知所有三二賓文論日往來炯炯高義申炎雨回

衆壑涼飈起脩畛兀然林木下日入忘歸輪玄蟬夕益  
聒去鳥一何頻野行畏多露無使侵衣巾

大復集卷八

欽定四庫全書薈要卷一萬六千九百六十六

集部

大復集卷九

明 何景明 撰

五言古詩五十四首

水營墅治田圃種樹

樵隱安於山農隱樂耕畔由來事不同各以性所玩倚

扉憇南岡

一作園

負杖行春岸時澤冒原隰遠水增波瀾

方塘菰蒲映迴渚鳧鷺亂插柳期息陰列竹冀成竿緣

坡引行條依墉植頽幹築堤屏芬穢激流代携灌踈慵  
外經濟卑賤鮮憂患諒懷原生恥庶悟孔父嘆汲古綴  
遺言欣焉秉柔翰

與賈郡博宿夜話

世故相糾纏人生劇如繫子方值憂艱子亦念淹滯避  
逅胡不頻茲歲忽將逝蒼蒼季冬夕悄悄昆虫閉積雪  
委沙曲迴風薄林際繁星爛高寒明月皓初霽聞雞起  
中夜捫蝨談當世蕭條時事危寂寞古人計天地悲瘡

瘼江湖愧經濟懷哉式微詩泣然出雙涕

除夕述哀四首

世事相倚伏日月更代謝百年能幾時一歲祇今夜逝  
者豈復迴有生無不化慘惻孤燈前悲啼數行下

二

別離今幾何墓樹亦已青徒褰素帷泣奈此玄室扃古  
城積陰雪虛牖臨寒星歲暮興慨念愁立空屏營

三

去年值今夕庭闈奉顏色今年值今夕空奠几筵側蒼  
苔翳幽隧翠柏開靈域顧望西山陰風雲為悽惻

四

憂人不能寐起踐中夜霜城笳絕仍響室燈慘不光所  
親半重泉有姊各一鄉附書與鴻鵠歲晚路更長

贈別孟望之四首

束髮事交結白首以為期以茲女蘿質託彼青松枝重  
聚故鄉園殷勤慰我私忽復遠行邁况值秋風時我有



一罇酒送君，瀨水涯。酒酣思無極，臨歧理桐絲。誰知清商苦，一彈一生悲。

二

迢迢望夏口，肅肅戒僕夫。金飈吹明星，行李已屆途。親戚各相送，萬里在斯須。喑喑中林鳥，日出相嗚呼。人生各有役，安能長相娛。

三

仲秋物色慘，遊子生離顏。朝辭義陽陌，夕宿武勝關。遙

望武昌路漢水何潺湲願為比翼鳥逸翮杳難攀願言  
終令德努力濟時艱同心苟不虧豈在離并間

四

公子事遠遊離別無復云丈夫萬里志焉能戀故羣我  
有千金劍經天決浮雲龍光久未試姑以持贈君願言  
終永佩勿令埋塵氛

遊西山二首

清晨命子駕飄飄遠遊邁願言歷嶠嶽况此春華在林

條紛可結石秀行當采道逢諧俗士謂子爾何隘人命  
未可期河清詎能待縱羽思山林潛鱗慕江海富貴人  
所欲吾志不可改

二

鬱鬱西山岑遙遙山上阪俯觀清澗流仰覩白雲返處  
世亦可促誰能遂仰偃夷齊歸首陽黃綺在商巖此道  
久不復斯人苦難挽振衣謝塵塗吾駕日已遠

元日言志

北杓建寅月東谷發首旦氣轉青陽暖日暎丹霞爛羣  
物欣向榮萬象修改觀自予脫朝簪及茲謝塵幹世事  
鑿倚伏節候感迴換巖耕慕長往淵綸恣永玩俯美潛  
波鱗仰慙薄霄翰欽此無悶言忘彼高飛嘆勉懷日新  
志庶以慰朝盱

觀春雪

騰空布柔雲蕩日溢繁吹素雪千里來飄揚九衢內積  
陰改玄節新陽獻青歲永辭寒卉寂甘並春華媚繽紛

散廣陌晶耀敞塵界既随游霰集復與流飈會臨牖玩  
靡足陟檻望逾邁參差百覺接萃光層臺對佳人御櫺  
軒上客倚飛蓋旖旎結華纓離縱飄素帶郢中有希倡  
陽阿豈恒態君胡慕高卧沉冥獨無類

仲春雨霽出遊郊麓覽物叙懷興言自歌四首  
旬陰豁初霽臨眺城西洲泱泱松上溜潺潺石間流積  
霖晦平陸春雲彌崇丘眷彼農人談寫我終歲憂

二

崔巍南山郭宛彼沙上道荷篠赴脩垆采萍涉流潦懷  
賢顧已後適已每不早緬茲山中人含念鬱中抱

三

幽人久見招解薜俟中林山行巖光暝水息霞氣陰隨  
行委流止寓物觀浮沉達人貴忘我奚用存知音

四

舉目怡清和周覽究昏晝衆壑積庭階攢峯羅戶牖攀  
林摘叢穎越巘采孤秀日暮天際雲忽與飄風構

贈梁宗烈二首

珊瑚產南海翡翠生炎洲  
豐林多異幹石璞皆良瓊  
瑰材植遐域萬寶聚巖幽  
豈無千金賈亦有萬斛舟  
此物匪為易惜哉不見收  
玉英匿龍淵黃金沉濁流  
輝瑩久已閔未蒙知己求  
徒歸匠者愆用負和氏羞  
謹子握中璧時哉毋闇投

二

飄風頃刻至征雲萬里游  
與子非風雲欲構良無由  
川

塗限山海音問邈中州升高望廣域極眺滄溟流浮煙  
隱榛樹白日蔽岑丘飛鴻不我顧逝鵠不我留寧無輕  
舟志浩渺安可求桂樹茂炎燠芝草翻靈洲獨處暮朋  
侶攀贈誰為酬倘荷衷眷言慰此平生憂

贈王文熙四首

以下京集

空堂夕燈明離思漫浩浩泠泠朱絲絃聽我別鶴操出  
門難久留各言慎所好江湖迥且深鴻鴈幾時到



行子夜中起月沒星尚爛天明出城去暮薄長河岸草  
際人獨歸煙中鳥初散解纜忽以遙川光夕凌亂

三

光風轉柳枝宛宛路之傍濛濛苑中花朝日耀其英停  
車欲有贈攀條折春芳春芳亦消歇但使故意長

四

息馬中林樹煙靄何氤氳遲遲仲春日叢薄華且芬上  
有單飛翼哀鳴振層雲冉冉征途客踟躕不忍聞嗟哉

彼何物日夜求其羣

惲功甫悼亡二首

捐棄不待年幽魂渺仙嶠庭下孤鳴鸞懸鏡恥自照帳  
冷凝素塵牕虛耿熠燿平生白頭吟空然發悲調

二

芙蓉望秋零幽蘭歇芳早不作雙頭花翻為斷腸草戚  
戚懷所思悠悠感衷抱睠茲白髮心窮年以相保

悼亡三首

冬夜一何長  
輾轉難及晨  
念彼重泉下  
杳杳隔千春  
中閨月皎皎  
紈素委流塵  
馳光安可追  
徃者無復陳  
悽悽向隅泣  
無乃女子仁  
丈夫自有志  
忍哭虞傷神  
沉思結中抱  
恨恨不能申

二

鳴雞報早朝  
出戶履晨霜  
仰視東方星  
三五不成行  
念子當此時  
燈前理衣裳  
恍然失所在  
零淚空滂滂

三

皎皎機中絹拂拭，明如雪裁為。雙中衣羅帶，紛綰結親持。  
持向我前，與我言結髮。豈足佩下體，聊以奉娛悅。執此  
百年心，嘆息一朝絕。人故物自留，欲視不忍發。藏之篋  
笥中，餘香日以歇。

挽葉進士

矯矯松柏枝，在彼丘中阿。上盤青雲端，蒼翠鬱嵯峨。惜  
哉千尺幹，嚴霜摧其柯。本為大廈用，不竟當如何。

贈李獻吉三首

西方有佳士於世寡所諧橫風整脩翰倏忽超九達天  
門限重關屢扣闈者辭濟濟列仙子冠裳競追隨青雲  
蔽閭闔仰視何逶迤皎日匿西陸馳先難遽回世無魯  
陽子坐惜朱顏衰

二

東風吹我衣白日何杲杲整駕出郭門脩塗浩橫潦登  
山采幽蘭日暮不盈抱采之欲何為遺我平生好豈無  
艷陽花言子好香草丈夫有本性安得不自保寸心苟

弗移可以覽穹昊

三

烈女守閨室憂日懷寸陰橫琴寫妙曲繁商激陽林悠  
悠行路子誰為識其音人生處世間貴在相知心所以  
采薇士甘餓西山岑

荅獻吉二首

鬱鬱雙鳳闕翱翔飛雲間我皇乘六龍平明開九關  
下有敢死士批鱗犯其顏白日運蒼昊薄暮浮雲還一

朝啟光耀忠誠良可宣

二

吾君古堯舜垂袞蓬萊宮止輦受羣善小大必有容  
緬懷燕鄒子悲號訴蒼穹彼蒼亦何神五月飛霜風至誠  
變金石何懼不感通

遊魯山城南舍二首

倚彼方外客逍遙城南墅初夏苗始盛荷笠事田圃地  
僻寡隣舍彌旬絕車馬紅葵生井上青榆蔭堂下前岡

後有岑原澤何煦煦清風林下酌狼藉列樽俎翻思在  
朝市役役徒勞苦

二

溪行日亭午暑氣稍見侵脫巾坐芳草前有嘉樹林白  
雲澹清景綠葉垂繁陰喜無鳴蟬聒幸有好鳥吟久厭  
區中緣撫茲意彌深浩歌答良友聊用開吾襟

中秋十七夜留康德涵飲二首

飄風會浮雲白曜奄西藏羈人惜短晷眷此秋夜長長



夜無與晤所懷浩難忘君子枉光駕  
嫵婉情未央披軒待流月  
輾轉錯華觴臨觴慘不御  
對景久徬徨鬱霧暖庭陰  
黯黯如降霜流波委顏魄  
茲歲漸以更消長互相謝  
盛滿安可常勗哉君子心  
謙謙道彌光

二

客心悲夕陰相顧增煩憂  
麾杯浩歌起欲去不可留  
屏營獨撫膺仰觀熠燿流  
倏焉四宇豁衆星爛以稠  
游氣降大谷浮颺扇清秋  
昊天舒華魄銜耀西南樓  
朱門歇

笙竽綺陌車馬休嗟爾晨明月燭燭安所求

詠懷十首

北陸無淹晷歲邁陰已長攝衣起中夜凜凜悲嚴霜  
明月麗高隅繁宿縱以橫徘徊仰天漢惋彼參與商  
形影永乖隔萬里徒相望

二

烈炎灼崑岡乃辨金石堅金石有恆性銷鑠詎能遷  
新樗莫傷桂刈蕭毋及蘭薰蕕不同器清濁本殊源  
君觀

高翔翼卑棲非所安

三

英英園中槿朱榮媚朝陽朝陽倏西墮朗月借其光馳  
輝難久耀華隕不再揚番番白馬郎皎皎青樓娼容好  
豈足恃相要在衷腸

四

積薪以待燔畜裘以御冬為物貴及時餘者安足庸金  
張藉地勢衛霍承華封馮生守窮巷白首不見容賤者

日迤邐貴者日以崇邈彼天上京玉宮闈九重高高不可測欲往將何從

五

知鳥去惡木螻蟻戀腐莖復隍啟危滿為山忌將成泛觀瀛海內巨細各有情哲夫炳身後昧者營其生千金買一壺為豫當及早江湖多風濤舟楫不可保

六

寂寂沅湘流長江上有楓青蕙綠廣隰綠蘅被洲中揚

舫沂烟沚遙瞻二妃宮二妃何婉孌  
寒馨振微風解珮遺下女將以明  
我衷光采不易合精誠渺難通浮雲蔽  
江臯白日忽已晚還顧蒼梧原何時翠華返

七

飛鴻遵故渚長鳴有餘哀北地多悲風  
霜雪日以摧靈鳥集君舍君反見疑猜  
忠信苟不顯殺身亦何為始知山梁雉  
欲下仍徘徊

八

長安有綺樓文牕結朱䟽俯視千萬甍遙臨十二衢樓  
中彈瑟女容采耀城隅豈無吉士誘失身良為愚迴風  
入總帳倏忽白日徂玉顏易銷鑠不久當何如

九

白露晞朝日苔榮委清秋長風吹野草飛藿不自謀猥  
彼衆多子安知良士憂覆水置平地一散永不收鼂錯  
憂漢室翻為六國仇禍機苟不測談笑生戈矛留侯信  
人傑逝從赤松遊

十

白玉本自白蒼蠅亂其真讒言解膠漆况匪平生親烈  
士死道傍貪夫登要津自古皆有然茲恨何當申蓬丘  
眇煙霧貝宮鬱嶙峋列仙如可期吾將躡清塵

東臯

藹藹東臯村中有幽人宅茅堂入空林草徑無來客林  
中桂樹英容采耀月夕寒香有時匱秋來望攀折

贈邊子四首

自予辭京邑念子守南服歲序阻歡覲川塗積遐矚比  
驚方自茲東轅偶相值聯鑣始宋中解纜及河曲

二

同車越梁晉覽歷多古疆紆遲衛流汭轉盼淇水陽感  
來意不淺道故言已長辛勤眷途語愴惻悲別章

三

戎馬暗中原嗟此遠行子遙遙赴城闕戚戚望桑梓路  
阻難可通河清詎能俟俯仰君父間出處良在此



四

懽聚理無恒  
悲離情有傷  
况茲征途間  
詎能久相將  
浮雲興歲暮  
素雪翳晨光  
揮手自茲別  
後期應毋忘

大復集卷九